

DISSERTATIO INAUGURALIS MEDICA,  
DE

# HEPATIS SCIRRHO,

*Quam*

AUSPICE DEO PROPITIO

*Et Consensu atque Auctoritate Gratosæ Facultatis Medicæ,*  
IN ALMA REGIA FRIDERICIANA,

P R Æ S I D E

DN. D. MICHAELE ALBERTI  
SACR. MAJ. REG. BORUSS. AULICO ET CONSIST. MAGDEB.  
CONSILIARIO, MED. ET PHILOS. NATUR. PROFESSORE  
PUBLICO ORDINARIO, ETC.

DECANO SUO SPECTATISSIMO,

*Domino Patrono, Præceptore ac Promotore suo omni honoris cultu prosequendo,*

PRO GRADU DOCTORIS

SUMMISQUE IN MEDICINA HONORIBUS ET PRIVILEGIIS DOCTORALIBUS LEGITIME IMPETRANDIS,

HORIS LOCOQUE CONSUETIS

ANNO MDCCXXXI. D. SEPT.

PUBLICÆ AC PLACIDÆ ERUDITORUM VENTILATIONI SUBJICIET

AUTOR ET RESPONDENS

JOHANNES GOTTLOB PETRI,

GUBENA-LUSATUS.

---

HALÆ MAGDEBURGICÆ,

TYPIS JOH. CHRISTIANI HENDELI, ACAD. TYPOGR.







## PROOEMIUM.

**E**ffatum *Æneæ Sophistæ in ep. 19.*  
est: *Donec morbi latent, etiam remedia in me-*  
*dio posita latent, & dominatur in curatione er-*  
*ror: morbi vero cognitio quasi lumen quoddam*  
*arte refulget & aperit remediorum copiam, ne-*  
*que dubiam amplius & ancipitem curationem*  
*adfert: hoc adsertum & vera & falsa complectitur:*  
veritas est, quod non pauci deprehendantur latentes  
morbi, adeo ut medici quidam peculiari studio varia  
meditatione de occultis morbis egerint, utpote *Eustach.*  
*Rudius, Muncerus, Verderius* & e recentioribus *Senner-*  
*tus*; qui plurimi venenatos affectus ad hanc classem  
retulerunt, quamvis varii alii eo referri mereantur,  
quorum causæ sunt internæ latitantes polyposæ aut a-  
liæ concretiones, intimiores diversarum partium ob-  
structiones & infarctus, latitantes abscessus, topha-  
cæ nonnullorum viscerum indurationes, exsicca-  
tiones, præternaturales partium concretiones, ru-  
pturæ, &c. de quibus valet, quod *Aphrodisæus in Pro-*  
*œmio Problematum* elocutus est: *infinita in rerum natura*  
*existunt, quæ sola experientia cognoscuntur & propterea a*



*medicis arcanae proprietates appellantur ; unde nonnunquam sub scrutinio anatomico & morbi & mortis causa detegitur: veritati porro respondet, quod latentibus adhuc morbis, remedia non modo in medio posita, sed & plane incerta ac fallacia sint: veritati congruit, quod sub occultis morbis magnus pateat ad errores aditus: verissimum est, quod, qui bene morbum cognoscit, juxta Celsi monitum, bene aut melius curare possit, nec abludit a veritate, quod cognitio morbi cum genuinis suis causis, indicationes sive operationes quidem medicas congruas, rationales atque indubias suppeditet; attamen a veritate deflectit, quod talis cognitio remediorum copiam aperiat: siquidem in variis quidem perspectis ægrotationibus non datur aditus ad causam morbi subjugandam, ut in talibus casibus medicus quidem & morbum & ejus causam exacte pernoscat, insuperque recte concludat, quæ necessaria ac utilia esse possint, interim interdum defectus congruorum auxiliorum premit & accessus ad sedem mali nimis implicatus, si non penitus præclusus est: verum proinde etiam est, quod in tali animadversione Quintilianus declam. 8. §. 20. pr. eloquitur: Sufficit quod aliquando jam facta ex unius hominis inspectione, ad totius intellectum naturæ medicina profecit: quid allaturus huic ægroto es, quod non tot seculorum, tot languentium experimenta deprebenderint: interea non consultum est in intricatis morbis periculum, aut experimenta per mortes facere: quare idem Quintilianus declam. 8. §. 18. de tali medico ait: non novi, inquit ille, languoris genus: post hanc vocem, me hercule, non debe-*



deberes committere agros, etiamsi vellet experiri potionis haustus, ciborum fomentorumque novitates: haud enim sufficit in latitantibus morbis extrinsecus, aut per ambages mederi, sed fontem mali aggredi, ut *Chrysostomus hom. 10. init. ad Roman.* ait: præstantissimi medici ægritudinum radicem curiosius semper indagant, atque ad ipsum mali fontem ante omnia accedunt: & ita in omnibus operationibus suis judiciose, perite & conscientiose medicus procedere debet: huc quadrat dictærium *Hippocr. de decenti ornatu §. 3. text. 17. sq.* quicquid artificiose factum, ex ratione prolatum est & productum, (i.e. cognitionem morbi supponit:) aut ut in *Lib. de arte §. 20. text. 4.* profitetur: medicus siquidem suffecerit ad cognoscendum, sufficiet etiam ad sanandum; quicquid autem artificiose dictum est, non autem factum, methodi inartificialis, demonstrativum existit: nam putare quidem non autem facere, ignorantia & inartificialitatis signum est: Hæc meditatio mihi in mentem incidit, quando inter alios affectus intricatarum qualitatatum, morborum Hepatis disquisitionem instituo, qui non modo numero, sed & gravitate & latitante aliquoties qualitate, multos alios superant; ob id *Mercatus Opp. Tom. I. Montagnana in Opp. selectior. Lib. IV. Consiliorum, Joël. Opp. Med. Tom. IV. Seitzius in Tabb. curat. & Bianchi in Historia Hepatica Part. II.* seorsim Hepatis morbos tractarunt: que amplior ac diffusior hæc etiam pars est, quo crebrioribus usibus ac functionibus inservit, quo largiori humorum affluxui patet, quo differentes magis substantias sub humorum affluxu admittit, quo copiosioribus vasis sanguiferis instructum est,



viscus, quo mollior ac laxior ipsius est substantia, quo majorem in molem accrescere & expandi potest, (ut multi medici singularibus observationibus immensam ejus magnitudinem describant, ut *Job. Maur. Hoffmannus in disquis. corp. hum. anatom. pathol. Specim. 6. n. 10. Bartholinus Cent. 3. Ep. 1. Schenck. Lib. 3. obs. rar. de Lien. obs. 9. A. E. L. An. 1714. Octobr. p. 484. Blancard. Anat. Pract. Cent. I. obs. 76. Cent. 2. obs. 12. Panarol. Part. 4. obs. 25. Salmuth. Cent. 1. obs. 21. Boneti Sepulchr. anat. Lib. IV. Sect. 12. obs. miscell. 27. p. 571. Sect. 7. obs. 4. §. 6. p. 435. Ayrer disp. de scirr. hep. in præf. & §. 6. Wepfer obs. p. 45. A. N. C. dec. 3. an. 3. app. p. 106. an. 1. obs. 122. Bianchi l. c. c. 2. & plurimi ferme anatomici reliqui) eo numerosior morbosarum afflictionum species, ut & intricata ac latitans aliquando talis præternaturalis offensio ac dispositio hanc partem occupare solet & potest, ut ea propter ad sanitatem ac morbos ferme plus, quam aliud organon contribuat: Et si unica corporis pars, talem malorum lernam ac catervam comprehendit, sane immensum morborum numerum, qui corpus humanum affligunt, facile concedere & agnoscere possumus; quamobrem illorum virorum industria atque sollicitudo laude utique digna est, qui speciali attentione cujuslibet partis morbos scrutantur & qui demonstrant, quales affectus morborum ab harum partium diversa alteratione ac læsione in reliquo corpore originem ducere soleant: ast ne in diffusio-  
ne*



ne dum Inaugurale Specimen a me producendum ac exhibendum erit, brevi explicatione, quantum ratio temporis & occasionis mihi permittit, commendare & pertractare cogito: videlicet de HEPATIS SCIRRHO agere impræsentiarum constitui, cui conatui, ut DEUS Ter. Opt. Max. prospero successu annuat ac benedicat, humillimis contendo precibus.

§. I.

**D**E Hepate ex uno velut ore, & iisdem ferme verbis testantur *Zacutus Lusitanus Med. Princ. Histor. Lib. 2. hist. 105. paraphras. p. 371. Amatus Lusitan. Cent. 3. curat. 48. in schol. Forestus Lib. 19. obs. 13. in scholio, Bianchi historiae hepaticæ Part. 2. c. 5. §. 10. p. 151. sq. quod duris tumoribus opportunissimum sit viscus, teste Galeno Lib. 13. method. c. 15. 16. quorum prior dicit: fit ut, cum mollem habeat carnem, facile tennes ejus venæ, & deinde omnis visceris substantia, a crasso viscidoque humore infarciuntur & obturentur, qui indies magis ac magis induratus, tenuiorique parte vi caloris, resoluta, absolutam perfectamque duritiem acquirit: Lommius observ. medic. Lib. 2. asserit, quod sæpe hoc vitio jecur, sæpius Lien tentetur, non sine certo metu gravissimorum atque lethalium morborum: quare allegatus Bianchi l. c. p. 152. sq. varias tumorum hepar detinentium species commemorat, velut ædema, obstructionem a lymphæ, leviolem & graviolem, atheroma, steatoma, Meliceriten, scirrhum, concretionem, callosam, gypseam, tartaream, sabulosam, lapideam, obstructionem spuriam, & Lancisius de mortib. subitan. tumorem cysticum æruginosa argilla plenum observavit,*

conf.



*conf. Boneti anat. pract. Lib. 4. Sect. 7. obs. 5. §. 1. p. 435. Sect. 2. obs. 10. p. 272. §. 1. Sect. 12. obs. 29. p. 572. Hildanus Cent. 1. obs. 51. multique alii: ita ut uberrima prostant testimonia, quam frequenter & quam variis tumoribus Hepar affligi soleat: Quam multiplex porro in hoc viscus humor effunditur, & quidem non modo larga Massæ sanguineæ quantitas a dextro cœliacæ arteriæ ramo & Vena Portæ afflua (quæ communiter paulo spissior esse solet, præc. a Vena Portæ proveniens, insuperque ex primis regionibus multas impuritates advehit) sed & notabilis gelatinosi chylolymphatici & conjuncti mucilaginosi, ut & serosi simplicioris & pro bile formanda idonei liquoris copia, tam discrepans in eodem infarctus ortum trahit, hinc vulgo in sanguineos, lymphaticos, phlegmonodeos & biliosos tumores dispescuntur; quemadmodum uberrimis observationibus anatomicis comprobatum est, quod ipsa bilis in suis vasculis, ductibus & poris, imo ipsa cystide in crassitiem aliquam ac tophaceam plane duritiem transire, adeoque harum partium infarctum & intumescentiam causari soleat.*

§. II.

Ex diversis talibus, hepar affligentibus & occupantibus, tumoribus, præsentī loco atque themate *Scirrbum Hepatis* quoad principales respectus explicare animus mihi est; notatio nominalis hujus affectus significat indurationem & quidem relative partis mobilioris, mollioris, fluidioris &c. hinc præsens affectus formaliter complectitur vel totius ambitus, vel alicujus regionis in hepate indurationem, aut tumidum durum infarctum, plus vel minus duritie qualificatum, modo in superficie & convexa hepatis parte, modo intimius existentem achærentem, functiones hujus



hujus organi valde lædentem ac vicinarum partium *liberum* motum, *naturalem* qualitatem ac usum una admodum violantem, turbantem & affligentem: hic tumor aliquando extrinsecus tactui facile *manifesta* ac renitente duritie se offert, aliquando hæc, si ipse *intimior* est, etiam *obscurior* existit: communiter quidem huic tumori tribuitur qualitas, quod *indolens* sit, uti *Gorræus* ita Scirrhum definit, quod sit *tumor præter naturam durus & doloris expers*, quæ *Galen*i definitio existit *Comm. 4. in Lib. de rat. vict. in morb. acut.* & quamvis *talia* plurimum loca ipse occupet, quæ *haud* eximie sensibilia sunt, utpote *glandulosa, cribrosa & vasculosa*, quo *hepar* ac *lienem* refero, tamen ejusmodi tumor præternaturalis non omni *molesta sensatione* destitutus est, quamvis *acutus* dolor illum *haud* comitetur: hinc *author* *definit. medic.* referente *Fæsius* in *æconom. Hipp. sub tit. σκίρρος* ita scirrhum definit: quod sit *tumor corporum durus ac gravis, cui motus & sensus conjuncta est difficultas*: quare *Galenus method. med. Lib. 14.* dicit: *Scirrhum appellamus tumorem durum, qui sine dolore, non tamen prorsus sine sensu est*, siquidem *molestus* sensus nunc in parte *affecteda* adest *gravativus, pressorius, angustatorius, ponderosus*, nunc in *vicinis* partibus *variæ molestæ*, imo aliquando *dolorificæ* sensationes excitantur: quam ob rem *Zacutus Lusit. l. c.* refert, quod *dolorosa* molestia in hepate non tam *membranæ*, hoc *vestienti*, quam *nervis* hepatis communicatis tribuenda, de quibus dicit: *ab his nervis in proximas jecinoris particulas quoquo modo vires distribuuntur ac communicantur, qui satis sunt ad deferendum illum obscurum ac debilem sensum*: quales nervos hic antiquior *author* *ferme* simili modo recenset, ac *Vieusens*



& ex hoc *Bianchi l. c. Part. I. c. 7. §. 6. p. 21. 22*: præterea quidam ex *magnitudine & diversa sede Scirrhi in hepate*, mutatum doloris & molestiæ gradum ac communicationem descripserunt; hinc *Amatus Lusitanus l. c. in casu* dicit: *gibbarum partium scirrhi tactu facile deprehenduntur - - nam concavis jecinoris partibus affectis magis stomachus & intestina affici consuescunt, ut ex Galeno citato & aliis variis docti evadimus*: de qua doloris varietate infra plura proferenda erunt.

§. III.

Quo vero hujus affectus indoles magis innotescat, præmittam in *historica* ejus descriptione nonnullas qualitates in *subjectis*, quæ hoc morbo affliguntur, annotandas: quare sciendum, quod morbosa hæc afflictio raro *infantes* corripiat, sicut *Hippocrates* illius haud reminiscitur, quando *morbos certæ ætati familiares* commemorat: quando vero in infantibus *vitia conformationis* a nativitate originem ducunt, aut ipsi *Rachitide* afficiuntur, aut pertinaci *atrophia* laborant, aut violentam *luxationem* vertebrarum dorsi patiuntur, aut eximias afflictiones a *vermibus* subeunt, aut *perversis medicamentis* vel *adstringentibus*, vel *alvi liberam ac sufficientem excretionem sufflaminantibus*, tractantur &c. tunc illis etiam eadem morbi species accidere potest & solet: quo loco in transitu allegamus, quod *Zacut. Lusitanus l. c.* ortum Scirrhi Hepatis ab *imperitia medicorum* ex parte demonstraverit; dum originem illius a prægressa alicujus partis inflammatione ita describit: *talis redditur medicorum imperitia, quando videlicet aut importuna auxilia, aut nimium refrigerantia aut valenter discutientia inflammatio-*  
nibus



nibus adhibent, ut sic humor vel frigore induratus, vel a calore exsiccat, lapidescat: comparate frequentius hic affectus natu provectiores affligit homines; interea cum aliis morbis certæ ætati familiaribus haud æqualem obtinet convenientiam, si respectus quoad historicum præc. conspectum & causalem deductionem comparamus: interea sub reservata limitatione asseverare possumus, quod in confirmata juvenili & sequente reliqua ætate & facilius obtingere & paulo magis actu invadere possit soleatque: proinde ratione sexus masculos æque ac fæminas corripit & in utroque sexu aptas suas invenit causas, adeo ut in sequiori sexu non modo Mensium negotium, sed in masculino variæ aliæ causæ hunc morbum provocare soleant: præterea subjecta melancholici ita dicti temperamenti, in quibus strictior solidarum & spissior fluidarum partium qualitas est, facilius huic subiiciuntur affectui, quales homines communiter difficiles valde ac impeditos humorum progressus per primas regiones experiuntur, proinde ex alimentis assumptis crassiorum chylum generant & ob varie mutatum excretionum successum non modo multas impuritates, sed & sensu physico accipiendas cruditates in massa humorum colligunt, unde præsens affectus facilius originem suam trahere potest & solet: huc quadrant personæ, quibus excretio alvi ac successus transpirationis insensibilis atque sudoris difficilis & insufficiens est; ut ob restrictionem humorum in interiorem corporis regionem iterum facilius in hepate talis infarctus ortum capere queat: hisce qualitatibus accedunt homines in præcipites ac tenaces partium constrictiones, nec non in affectus animi intensiores terroris,



meroris ac timoris inclinantes subinde etiam *sensibiles* ac ad motuum acceleratam immutationem proclives, in quibus facile *speciales congestiones* ad diversas corporis partes subitaneo ac vehementi gradu transeunt, unde idem affectus oriri aliquando solet; ut nihil dicam de qualitatibus certorum subjectorum adhuc *absconditis*, quæ *post mortem* demum inveniuntur & aliquando ad causam morbi, nonnunquam ad causam *mortis* referri merentur.

§. IV.

Nunc præsentis affectus *Diagnosin* brevi delineatione indicare, ejusque *principaliora signa* commemorare lubet: est vero hic affectus aut in *initio*, aut *incremento* aut *consummato* statu: de *priori meliora*, ratione curæ speranda sunt, de *posteriori deteriora* metuenda veniunt, & secundum hunc diversum statum ac gradum signorum *gravitas & numerus* discrepat: per initia quidem in leviori ac *minori* fundamento hic affectus *haud manifestis* ac ominosis se prodit indiciis, nisi per *intervalla* obscuras & *ambiguas* molestias in dextro hypochondrio subjecta sentiant, quæ vero tunc temporis minime *directe* de ingruente aut præsentente Scirrho accipi & agnosci possunt: attamen pro diversitate *causarum* ac subjectorum hæc initia *infarctus* nunc *lentius*, nunc *citius* increbescunt, donec in manifestum talem Scirrhum transeant: hinc *Rondeletius* Opp. ubi de Scirr. hep. c. 34. agit, ait: *memini, me vidisse quendam, qui tales tumores duros a paucis diebus factos esse assereret*: exserit vero sese ejusmodi affectus *tumore*, cum *tempore* augescente & quidem ita increbescente, ut quando subjecta affecta nunc magis *sedentariæ* vitæ inhærent, ille *accramenta* manifesta capiat, ut &



si multum *animo* affligantur ac angore, mœrore &c. turbentur, aut si aliquandiu *alvi pertinaces obstructions* concurrant, ipse tumor subinde *augeatur*, quando itaque talis Scirrhus *confirmatus* est, affert & infert in hepate satis notabilem *tumidam ac duram* inflationem, dextrum hypochondrium attollentem, tactui renitentem, nunc in *ambitu* suo *amplio*rem, aliquando *minore*m, ad contactum adhibitum molestum & *obscure* dolentem; quare Capi-  
vaccius ubi de hoc affectu tractat, dicit, quod hic Scirrhus *pressus* dolorem exhibeat & Sennertus ait: *dolor obscurus sentitur, quia partes vicinæ sensu præditæ a tumore hepatis comprimuntur, earumque unitas quodammodo solvitur*: quæ verba Capi-  
vaccii etiam sunt, addit vero hic author: *sed non tantum respiciendum ad dolorem, num adsit, nec ne, verum ad diuturnitatem & contumaciam affectus*: at-  
tamen notatu digna utique est circumstantia illa, quod aliquando hic dolor in hoc affectu *adsit*, quandoque *absit*, indeque medicus ex hujus *doloris comitatu* præfagia quædam de hoc affectu formare queat: *revocant* vero talem *dolorem* *congestiones* humorum ad hepar affectum tendentes, undecunq; enatæ fuerint, ad quam *congestionem* præ aliis respicit Riverius, quando illam utpote hujus affectus comitem & accidens allegat, dicens: *duobus modis in hepate Scirrhus generari solet, per fluxionem scil. aut congestionem humoris crassi & glutinosi in partis substantia, vel ab induratione aliisque tumoribus induratis &c.* de dolore hunc affectum comitante ait Lommius l.c. *recens Scirrbus si premitur, doloris exhibet sensum aliquem & locum medicinæ præbet: consummatus sensu penitus caret, neque tolli remediis potest*: Job. Maur. Hoffmannus in notis ad Hart-



*manni Praxin Chymiatricam p. 588. de hoc dolore ita dis-  
ferit : Scirrhi signa diagnostica petuntur a tumore duro,  
cum nullo aut exiguo dolore : Fonseca tom. i. cons. 42. de  
hoc dolore refert : dolor non continuo hunc Scirrhum se-  
quitur, sed sua praesentia motus in loco affecto majores te-  
statur, absentia contra pertinacioris jecoris obstructionem  
significat.*

§. V.

Quamvis Scirrhum Hepatis *ordinarie* ac constanter  
dolor haud comitetur, tamen *ordinarie* sensus ponderis  
aut molestæ gravitatis non modo *deorsum*, sed *antrorsum*  
prementis, in eodem occurrit, dum *successive* moles acin-  
farctus hujus visceris augefcens, non modo *pressione* sua  
deorsum tendente, sed & *ampliori* sua extensione *grava-  
tivam* hanc molestiam *latius* dispergit; siquidem medici  
facile judicare possunt, *in qua regione* hepatis tumor aut  
Scirrhus major existat; dum ex graviore *ventriculi* offen-  
sione *proximior* hujus partis regio *majori* hepatis infarctu  
onerata est: alias *major* scirrhus hæc moles *difficiliorem*  
respirationem causatur, quo magis pondus hepatis *li-  
berum Diaphragmatis* motum impedit, hancque partem  
sua *gravante* mole valde affligit, imo quo magis *dextram*  
ventriculi regionem ad *sinistram* premit, unde denuo dia-  
phragmati non exigua accidunt incommoda, &c. de hoc  
molesto sensu ponderis Capivaccius ait: *Sensus gravitatis  
ob membranam investientem maxime adest: si Scirrhus non  
est exquisitus, si exquisitus non item: licet ob compressio-  
nem partes vicinæ doleant: porro ait: adest sensus gravi-  
tatis sine febre, ad differentiam inflammationis: quando  
vero talis Scirrhus insensilis redditur, malum est indi-  
cium,*



cium, hinc *Galenus Lib. 7. de compos. medicam. per gener. c. 9.* ita judicat: *qui sensu caret, jam sanari non potest: siquidem qui imposita medicamenta, non per sentit, ecquænam spes auxilii inde expectari potest? cum qui sentiunt eatenus spem faciant, quatenus etiam sensus sunt participes: comitatur vero hanc gravativam molestiam impedita respiratio cum tumoris accremento augescens & intricatum totius affectus statum denotans, adeo ut ex asthmaticæ hujus afflictionis gradu majori, acerbior mali status certo agnoscisci queat: hæc respiratio difficilior redditur, quando ægri corpus valde commovent, aut aliunde sanguis in intensiorem motum pervenit, sive hoc evenerit, per ingesta calida, spirituosæ, sive per exæstuationem aliam internam aut externam, ut major sanguinis expansio & copiosior ad hepar affluxio partem semel affectam magis affligat, aggravesque: præterea in decliviori situ decumbentes, ubi hepar tumidum magis sursum & diaphragma premit, nec non alvi obstructionem aliquandiu laborantes tales ægri hoc tempore majorem in respirando difficultatem sentiunt: quo etiam illa ingesta contribuunt, quæ sanguinem valde commovent, aut alvinam evacuationem magis impediunt: quo loco *Crazen. in Medic. Pract. reform. c. 74.* annotationem addimus, cujus *Bonetus in Polyalthæ Lib. 4. c. 41. p. 746.* reminiscitur, quando de hoc affectu recenset: *respiratio hic impedita est, ut & in obstructione, ob metum doloris, quem ex alta respiratione sentiunt; vel etiam si tumor adsit, propter illum tumorem angustantem spatium abdominis; ita ut viscera abdominis magis resistent motui diaphragmatis: difficilior tamen multo est post exercitia, quia per exercitia sanguis magis movetur & calidior fit,*  
atque*



atque ita vasa distendit & omnes partes tumidiore reddi-  
 sic quoque tumorem auget obstructi hepatis (ut & lienis)  
 qui sic auctus motum diaphragmatis magis inbibet, & quan-  
 do ægri intensius respirant prædicta ponderosa molestia  
 extemplo acerbior redditur, indeque inspiratio valde af-  
 ficitur & impeditur, ita ut hæc signa præsentis affectus  
 singulari vinculo connectantur.

§. VI.

Præter hæc signa varia alia adhuc recensenda occur-  
 runt & quidem plus minus increbescens hepatis durities,  
 prout Scirrhus amplior existit, præc. quando extimam he-  
 patis superficiem, aut convexam vel gibbam regionem magis  
 occupata detinet; qui tumor magis tactui, imo etiam con-  
 spectui patefit, quando ægri in erectiori situ sunt consti-  
 tuti, nec viscus hoc retrorsum labitur; proinde non mo-  
 do ponderosam hanc duritiem sentiunt afflicti ægri, sed  
 & alii tactu percipiunt, quando decumbentes in sinistrum  
 se vertunt latus, quem situm ægri etiam ægre ferunt,  
 quoniam ponderosa hepatis moles ventriculum, & medi-  
 ante hoc diaphragma valde premit & molestat, unde cor-  
 dis ut & præcordiales angustiae provocantur, quemadmo-  
 dum aliàs subjectis, hoc affectu laborantibus, pulsus tur-  
 batus, durus, palpitans, inæqualis familiaris existit: Pro-  
 gressus sanguinis eapropter valde inæqualis est, nunc ex-  
 tremitates corporis morbosa horripilatio pervadit, alibi  
 inopinata & cum angustia stipata phlogosis alternat: appe-  
 titus valde turbatus occurrit; affligit difficilis concoctio,  
 ventriculi imbecillitas & flatulenta extensio cum cardial-  
 gia conjuncta, interdum inexpectati ac insoliti, admodum  
 tamen affligentes conatus vomendi invadunt; insultant  
 per



per intervalla cruciatus colici, flatulenti & distincte spleneticici; alvus ut plurimum est sicca & obstructa, & quo magis talis est, eo magis omnia pathemata hunc affectum comitantia exacerbantur: urina est imminuta, turbida aut flocculis turbulentis referta, quamvis Riedlinus Lin. Med. An. 4. Mens. Julio obs. 24. p. 839. Scirrhum hepatis in casu practico describat, qui nullum sui indicium præbuit: Color externi corporis sub hoc affectu conspicue mutatur, ita ut pro diversitate temperamentorum nunc ictericus, nunc pallidus aut cachecticus, nunc viridescens compareat; hinc Lommius Lib. 2. obs. medic. dicit: vultus obscurum fædumque colorem habet: addimus Foresti l. c. verba: Si ex nigra bile, color totius corporis ad nigrius declinabit, si ex crassa, lentaque pituita ad albidius vel plumbi colorem: Riverius dicit: color faciei est pallidus & quasi virescens, quia sanguis laudabilis non generatur: Casp. Hofmannus Instit. L. 6. c. 35. ait: in omnibus ita affectis colorem faciei esse plumbeum lividumque: in subjectis tamen sero bilioso abundantibus color magis flavescens est: quando subjecta spongiosioris forte ac succulentioris habitus corporis sunt, tunc magis cachecticus habitus corporis hunc affectum comitari solet: aliquando hic Scirrhus hepatis acerbiores lienis affectus in consensum trahit, qui a flatulentia facile discerni possunt; quo pertinent pathemata hypochondriaca, splenetica, melancholica: (quare Bonetus in thes. Pract. Lib. IV. c. 42. p. 748. n. I. ex Casp. Hofmanno originem Scirrhi hep. pituitosi ex melancholia hypochondriaca derivat) non raro hunc morbum agentes flatulentiae comitantur, quas minus attenti cum tota reliqua affectus historia val-



de confundunt, dum in hac flatulentia principalis causa minime quaerenda est, nisi haec antecesserit & longe alia causandi serie & efficacia hunc affectum provocaverit.

§. VII.

Supersunt adhuc alia signa, dum successive cum hoc affectu aut *eminenter cachecticus* & in *hydropicum* statum vergens, aut *hecticus, tabidus* aspectus concurrit, in qualem, pro *diversitate temperamenti*, subjecta afflicta propendent: quare *Dolæus in Encyclop. chirurg. Lib. 3. c. 4. p. 346.* dicit: *non omnia in omnibus concurrunt signa, sed nonnulla in his, alia in aliis, prout saepe causae secundum magis & minus & corporum dispositio variant: tumorem inter alios exactius describit Alpinus in Medicina Methodica Lib. X. c. 16. p. 632.* quando ait: *ex signis propriis hepaticae scirrhus est durities extans in dextra praecordiorum parte schemate rotundo, costis ex aliqua parte subjecta & propterea veluti decisa, ex alia vero parte circumscripta atque rotunditate terminat: conf. Capiuaccii annotatio & descriptio huius tumoris, quam Bonerus in suo thes. pract. l. c. allegat: de urina addimus, quod non modo Sennertus (quem male invehit Riedlinus l. c. & omniscium perperam nominat, quoniam in signis Scirrhi hepatis urinae paucam evacuationem commemorat) sed etiam Lommius l. c. Lib. 2. ejus defectum in hoc affectu acuescent: indicat etiam Bianchi l. c. Part. 3. de obstruct. hepatis. §. XI. p. 327. urinae parcitatem, & addit, hinc Scirrhus hepatis celerrime cachexia succedit, & nisi mature occurratur & hydrops & obitus: Alpinus l. c. scribit: *urina veluti Sandarachae colore turbata: proinde referente Capiuaccio, Avicenna lotii diminutionem in hoc affectu obser-**



fervavit : aliquando vero *naturali simillima* existit : vid. *Riedlinus Lin. Med. An. 6. Mens. Apr. obs. 12. p. 404.* *alvus* in aliquibus *sicca, adstricta & pertinax*, in aliis *segnis*, in quibusdam *biliosæ* occurrunt *egestiones*, dum *durities hepatis* regione *cystidis* vicina, *hanc vesiculam* premit, ut *bilis* ad *intestina* *copiosius* profundatur & illico præter *torminosos* cruciatus, *alvi fluxum* valde *anomalum* & *enervantem* causetur ; quam *egestionem* præc. *Alpinus* recenset : comitatur non raro *Scirrhum hepatis* *tussis sicca* & *suspecta* ; supervenit successive magis increbescens *virium prostratio*, *gravativa lassitudo* pedum, horumque *œdematosus* status, qui *communiter* cum *hepatis morbis* concurrat : *color facie* magis magisque *morbosus, pallidus*, aut ut *Alpinus* asserit : *sæpe color auriginosus sive arquato similis* apparet : quia *bilis insufficiens* a *massa sanguinea* in *indurato* hepate separatur & *secernitur* & quia aliquando *largius* in *intestina* effusa, *majori copia* cum *chyllo* in *massam sanguinis* absorbetur & recipitur, ubi *pro diversa* sua *miscela* *varium colorem* faciei & *corporis* reliqui causatur : successive tales ægri emaciantur, *contabescunt* & *hectica* corripuntur : sub *accremento* hujus *Scirrhi* affligunt *sudores nocturni*, aut *phlogoses* cum *sudore manuum* post *pastum* : molestat *insolita siticulositas* & *salivæ glutinosa* consistentia ; aliquando experiuntur ægri *internum æstum*, & *somnus* non raro *turbulentus* existit : nonnunquam angit *ventriculi tumor* : alternat interdum *anomalus* status *hæmorrhoidalis*, *torminosus*, *protuberantias* valde *dolentes* & *affligentes*, *hæmorrhoidalia* loca occupantes, inferens : quandoque *fluxus hepaticus* intercurrit : (cujus *nexum* cum hoc affectu ex *Casp. Hofmanno*



*Bonetus l. c. n. IV. ita allegat: Si quod dixi in hepatis imbecillitate, post excrementa, Lotiva barbaris dicta, non fiat fluxus hepaticus iisdem vocatus, suboritur obstructio & tandem Scirrbus, quem sanguineum appellabo.)* quæ singula pathemata acerbiores reddunt totum affectum. De reliquo communiter illa signa hunc Scirrbum comitantur, quæ *Aurelianus de Scirrhis* profert: Scirrhosos omnes sentire gravitatem, difficultatem spirandi, idque difficilius in itinere & ambulationibus clivosis, pigros atque tardos esse in motu, anhelantes, siticulosos, colorem ipsorum mutari, pedes tumescere, aliquando cum his adesse, latentem febriculam, hydropisim, suffusionem atque continuam cibi corruptionem: cæterum cum hoc tumore similes afflictiones concurrunt, quæ *sec. Riedlinum l. c.* cum hepatis obstructione coincidunt, & *dyspnæa, tussis*, magis affligentes, si æger decumbit, ut & *pedum tumor*; Et hæc quoad Diagnosticam præsentis affectus explicationem sufficiant.

#### §. VIII.

Nunc in *historica* hujus affectus explicatione aliquas animadversiones proferre lubet, quæ ad *Prognosticam* illius delineationem pertinent: quando itaque hic Scirrhus firmas jam radices egit, ac diutius duravit, nec non ampliores & profundiores hepatis regionem occupavit deterioris est conditionis: allegamus huc *Bianchi l. c. §. XII. p. 327. 328.* verba: Scirrbo minorem tantummodo hepatis partem infestante, diutius adhuc ægri vita protrahitur: brevius autem eodem potissimam hepatis portionem invadente: quod si totum hepatis corpus scirrbofa aliquando duritie obsideatur, mors fores pulsât; præc. quibus ol-

vus



*vus non dejicit observante Galeno: qui Scirrhi ad suppurationem perducuntur, ex practitorum observatione facile in cancrum abeunt, nullamque curationem suscipiunt; nec tamen feliciorem suscipit hepatis Scirrhus, quamcunque induat habitudinem, hic enim ut plurimum incurabilis est, præsertim confirmatus & grandior: huc quadrat Riedlini effatum Lin. Med. An. 6. Mens. Apr. obs. 12. p. 405. inveterata hepatis durities rarissime medicamentis cedit. evenit plane aliquando, ut contumacior hep. Scirrhus lapidescentiam partialem hujus partis causetur. conf. Forestus l. c. obs. 14. & Cattierius obs. 10. Glissonius in anat. hepat. c. 7. p. 104. Casp. Hofmannus Instit. Lib. 3. c. 65. non raro cum hoc affectu icterus conspirat: unde Lommius l. c. ait: æque horrendum est, durum jecinoris tumorem aurigini initia præbuisse, aut vicissim hanc ex illo esse, cæpisse, vid. Schachtii exercitatio medico-Practica de ægro icterititia phthisi laborante. A. E. L. An. 1724. Mens. Dec. p. 532. sq. quadrant huc Boneti verba l. c. p. 749. n. 27. Scirrhus ictero succedens aut illum generans perniciosus: unde Hipp. aph. 42. Sect. 6. morbo regio laborantibus, si fiat hepar durum malum. non raro cum Scirrho hepatis una Lienis, Pancreatis, aliarumque partium abdominis præc. glandulosarum obstructions & indurationes coincidunt, vid. Act. Berol. Dec. 2. Vol. 3. p. 58. 59. Sanguinei Scirrhii communiter periculosiores sunt & breviorum decursum cum funesto exitu fortiuntur: hinc facile in subitanæ hepatis sphacelationem delabuntur: in pletboricis & quibus commotiones sanguinis congestoriæ & excretoriæ familiares, nec non quibus solutares hæmorrhagiæ suppressæ sunt, velut Menses, aut placidæ Hæmorrhoides periculosior hic est affectus; addimus ite-*



rum verba C. Hofmanni ex Boneto l.c. p.748. n. VI. fit etiam Scirrhus in διὰ δὲ; hoc est translationibus humorum de hepate in Lienem, de Liene in bepar, 2 in 6. Epid. 28. nisi enim natura vacuet, & per alvum vel per hæmorrhoides &c. in subjectis præcipitis, iracundi & vehementis animi, ut & in alios animi affectus valde pronis, idem affectus ominosior est: quando hic affectus multa ac tumultuaria alvi profluvia infert: valde periculosus existit: hinc Galenus Lib. 2. ad Glau. c. 5. dicit: Scirrhum hepatis ab initio quidem sanavimus sæpius, ubi vero ad plures dies forte foret extensus, neque ipse potui sanare, nec alium vidi, qui posset: omnibus vero, qui sic affecti sunt, ex necessitate sequitur aliqua intercus: pereunt autem plurimi in tempore longo: quosdam vero novi etiam brevi pereuntes, quibus alvus multa dejiciebat. Capi vaccius dicit: in Scirrbo legitimo si concurrat fluxus ventris, celeriter moriuntur, si non jungatur ille fluxus, aliquandiu perdurant.

§. IX.

Quando altiores radices hic affectus format & confirmat, tunc ominosior cachexia, hydrops, hectica, ædemata majora & icterus niger (quem ultimum etiam Glissonius l.c. p.103. allegat.) superveniunt, ac funestum exitum accelerant: unde aliquando hic Scirrhus sub tumorem hydropicum se occultat. vid. Riedlinus Lin. Med. An. 4. Mens. Jul. obs. 24. p. 604. de hoc superveniente hydropico statu Lommius l.c. dicit: itaque tum hydrops nasci incipit, qui ut primum jam accesserit, nulla ægrum medicina periculo subtrahit. Dolæus p. m. l. c. 351. profitetur: Scirrbi viscerum sunt curatu difficiles impr. Hepatis, qui sæpe transeunt in hydropem, ascitem, cachexiam, icterum: Job. Maur. Hof-

man-



mannus l. c. sentit: *Prognostica signa Scirrhi hepatis omnia mala sunt: nam eundem nisi recens & in externa, aut gibba Hepatis parte tantum obveniat incurabilem & in cachexiam subit.* Horstius commemorat *hepar scirrhosum post vomitum sanguinis cum dejectionibus nigris lethale. Part. 2. Lib. 4. obs. sing. 3: de Scirrbo hepatis phlegmonode cum hydropse sequente. vid. Valleriola lib. 1. obs. 2. cum gangræna in cruore dextro, ib. lib. 3. obs. 10: de hep. duritie cum Cachexia legit Riverius Cent. 1. obs. 69. de jecoris scirrbo in hydropem lethalem mutato. conf. Forestus Lib. 19. obs. 14. de Scirrbo hepat. cum ædematoso crurum statu. concil. Job. Raym. Fortis Tom. II. Cent. 3. Consult. 38. Febrem continuam huic affectui supervenire periculosum est: inflammatorium internum sive hepatis, sive alterius partis affectum huic morbo se conjungere valde ominosum est: nec desunt rationes & observationes, quas ubique Doctores proferunt, quorum plurimos hætenus nominavi, quibus veritas confirmatur, quod Scirrhus hepatis ex inflammatione ejusdem ortum ducere queat soleatque, quamvis Bianchi l. c. Part. II. c. 5. §. 13. p. 155. judicet: Plures Scirrbi hepatici observationes habemus in authorum paginis, plures etiam fallacias in iisdem legimus; ut, Scirrhum jecoris suppurari posse; imo & factâ, exterius cauterio, aut incisione apertura expurgari: Scirrhum jecoris legitimæ inflammationis sobolem esse posse: Scirrhum jecoris remediis interdum introsumptis curabilem; aliaque de eo consimilia: quæ omnia prorsus refello. Si hic affectus ex perversa mali hypochondriaci, negotii hæmorrhoidalis, processus Mensium ac Lochiorum medicatione originem traxit, deterioris est conditionis; in subjectis tenerioris corporis & sensibilibioris animi hic affectus*

ctus



Etus citius funeste excurrit: quando hic morbus a malo genio intermittentis, præc. quartanæ febris, nec non mala ac imperita tam ejusmodi febris, quam aliorum præcedentium morborum medicatione ortus est, ægerrime tractatur: quando prægressos abortus & difficilia puerperia sequitur mali ominis existit: quo magis repentinas viri-um prostrationes infert, eo periculosior est: nisi denique in primis suis accessibus dextre tractetur, rarissime extirpari & percurari poterit: denique in nonnullis subjectis Scirrhum hepatis suspecta navium hæmorrhagia comitatur, quæ cum aliis hepatis obstructionibus quandoque concurrit. vid. Bianchi l.c. Part. II. c. 5. §. 14. Et hæc quoad Prognosticam hujus affectus explicationem annotare volui.

§. X.

Pauca adhuc in historica præsentis affectus disquisitione annexere lubet, quæ concernunt differentiam illius ab aliis affectibus: discrepat enim ab obstructione communi hepatis, quæ lenior & levior hoc Scirrho esse solet, quoniam hic firmiorem ac tenaciorem hepatis occlusionem constituit, unde obstructio talis gradu augescens proxima via in Scirrhum abit: hinc C. Hofmannus l.c. differit: facit longius progressa obstructio Scirrhum; ita aliquando flatulenta abdominis extensio in dextro præcipue hypochondrio occurrens, talem Scirrhum æmulari potest: ast illa transitoria est, ac penitus brevi aliquando tempore evanescit: hinc Rondeletius in Praxi cap. 34. dicit: agnoscitur Scirrhus tactu, nisi cum venter flatibus intumuerit, tunc enim hepar infra residet, muscoli ventris sursum elevantur a flatibus, qua occasione decipiuntur medici, cum venter detumuit, qui  
du.



*duritiem vel tunicam viscerum inveniunt; in communi enim flatulentia deest durities illa, quæ huic Scirrho essentialis ac perpetua est; attamen flatulentia per intervalla etiam hunc affectum utpote symptoma affligere & comitari solet; allegamus insuper verba Zacuti Lusit. in Med. Princ. hist. l. c. p. 371: hunc Scirrbum a cæteris tumoribus distinguēs: ab inflammatione, quia dolet: ab erysipelate, quod non est durum; ab œdemate, quod tactui non resistit, sed cedit; a flatuosis atque aquosis tumoribus, quod hi reddunt sonum, ut tympanum, quæ in scirrbo non reperiuntur: plures differentias tumorum hepatis affert Bianchi l. c. Part. II. c. V. §. X-- XIII. nec non Glissonius l. c. p. 100. sq. qualescunque vero tumores Hepar occupaverint, illi semper fati intricati ac ominosi existunt: quod vero differentiam Scirrhi hepatis, quoad causam materialem attinet, tunc illius in præcedentibus mentionem feci; siquidem Bianchi l. c. Part. II. c. 5. obstructiones hepatis in calidas & frigidas discernit: conf. Bonetus l. c. ubi n. I. II. III. IV. ex C. Hofmanno Scirrbum pituitosum, melancholicum, biliosum & sanguineum producit; de reliquo non raro tumor hydropicus, ut antea indicavi, cum hoc Scirrho hepatis concurrat, aut sub hydropica abdominis distensione hic Scirrhus occultus hæret & latet, quem externo contactu detegere, alter tumor prohibet: aliquando grandior mola in utero, nec non mensum, Lochiorum & Hæmorrhoidum suppressio variis obscuris tumoribus, in abdomine orientibus & quandoque satis tenaciter subsistentibus ac increbescantibus, sese exserit, qui vero tumores variis etiam signis a Scirrho genuino hepatis discerni possunt: unde pauca hæc de differentia agere & indicare placuit.*

§. XI.

Ordo tractationis nunc requirit, ut brevibus causas  
D præ



præsentis affectus eruam & *Pathologicam* illius explicatio-  
nem exhibeam: *Formalis* itaq; ratio Scirrhi hepatis est hu-  
jus visceris, *firmitior, durior, latior & major* obstructio ab hu-  
more *inspissato* nunc *magis lymphatico*, mucilaginoso, alibi  
*simul a sanguine crassiore* aliisq; connexis materiis excitata  
ac sustentata, quali humore hujus partis *permeabilitas* val-  
de læditur, dum vel *membranosa* ejus porositas, vel *aliqua*  
*vascula* præc. venosa obstruuntur, obstructa proinde regio  
successive *magis indurescit*, ac mole & magnitudine *auge-*  
*scit*, unde singulæ functiones naturales *secretoriæ, depura-*  
*toriæ & sanguinis repurgationi, resolutioni & reparationi*  
dicatæ valde violantur, impediuntur & ex parte sufflami-  
nantur: utut enim *Ruyschius in thesaur. anat.* totam hepa-  
tis texturam vasculosam esse adseravit, tamen in *Cent. ob-*  
*ser. chirurg. obs. 51.* dicit: *quod Lien, hepar, renes succenturi-*  
*ati non inepte pro glandulis sanguineis haberi queant:*  
unde *obs. 45. in hydropicæ cadavere glandulas hepatis*  
*admodum tumefactas* demonstravit: nisi ipse *Ruyschius*  
*thes. anat. prim. repos. 2. n. 7. & thes. 9. p. 46.* ex eadem senten-  
tia adstruat, quod *glandulæ nil nisi fasculi & extremitates*  
*vasculorum* sint: quemadmodum *Vieussens in novo vaso-*  
*rum corporis humani systemate* p. 119. adserit, quod *venæ*  
*cavæ & portæ propagines in hepate in membranaceas cellu-*  
*las ovales abeant, inque his pro hepatis glandulis constitu-*  
*endis diversimode convolvantur;* quam opinionem vero  
multa argumenta adhuc premunt: Sedes vero obstructio-  
nis est nunc *superficialis*, modo *profunda* in substantia he-  
patis, aliquando per initia *minor*, sub temporis mora am-  
plior & *spatiosior*: nunc in *convexa*, nunc *concava* parte,  
nunc *magis dextrorsum*, alibi *magis sinistrorsum*, aliquando  
in utroque loco simul; quo *major* in certis subjectis ad-  
est,





est copia *gelatinosi hepatici* humoris, eo facilius hic tumor scirrhus, *trophaceam* & lapidescentem duritiem ac firmitatem assumit; hinc in scrutinio causæ *materialis* non æque necessitas postulat ut falsam, tartaream, acidam, hypochondriacam & similem impuritatem accussem, dum magis solide & *perspicue* talem obstructionem & consequentem *indurationem* hepatis a prædictis humoribus demonstrare possum: neque enim *absolute* humorum *spissitudo* semper ab *acido* aliquo inimico provenit, sed illius *variæ causæ* esse possunt.

§. XII.

Hæc obstructio hepatis & vel *glandulosæ* vel *vasculosæ* illius substantiæ & fabricæ per varias causas *proximas* & *remotas* impulsivas provocari potest & solet, & quidem quoad ita dictarum *rerum non naturalium perversum* usum, aliquando a *repentino* aut nimio, sive interno, sive externo *refrigerio* corporis oritur, dum post intensiorem *commotionem* & exæstuationem, subito *utroq;* loco corpus *sensibili* frigore percellitur, ut *repentinæ restrictiones* sanguinis ad *interiora*, & inter alias partes potentius ad hepar ruant, hocque confestim *nimiâ* sanguinis copiâ *obruant*, ut *subitanea obstructio* in eodem viscere oriatur, quam aliquando *inflammatoria* excipit febris, quandoque *hectica* sequitur, aliquando Scirrhus talis pedissequus comitatur: quid quod in observatione medica occurrit, ut *frigidus* haustus, *exæstuato* corpori ingestus, ob præcoces *spasticas* strictureas in *ventriculo* hujusque *confiniis* repentinam talem humorum stagnationem & partium obstructionem causetur: quando itaque *frigida* aëris qualitas, *salutares* excretiones, sive *sudoris*, sive *sanguinis* in *Mensium* & *Hæmorroidum* negotio, *confestim* & tenaciter *repellit* & *obstruit*,





tunc in nonnullis subjectis impetus *regurgitationis* & conjunctæ *congestionis*, hepar, utpote partem alioquin *magis, quam alia* esse solet, *sanguine* impletam & *oneratam*, obruit, in qua parte eo citius & potentius *fonticæ* tales alterationes suboriri possunt: id quod etiam fieri solet, si *fæminæ menstruata*, aut viri *hæmorrhoidarii* nunc libere & largiter profluente sanguine in aquam sensibilibiter *refrigerantem* descendunt, aut delabuntur, inde tunc præsens affectus aliquando ortum trahere solet: & hæc naturalis qualitas tanto *citior* & potentior efficaciam habet in subjectis *sensibilioribus* & corpore *tenerioribus*; nec non *pleniori* humorum cumulo instructis & simul aliquali illorum *crassitie* laborantibus; quippe qui *concursum* causarum *citatiorem* talem effectum post se trahit, dum ex *motuum* occurrentium & *materialium* subjectorum & instrumentorum *aptitudine* præsens affectus *facile* generatur & acceleratur: alias vero *nuda frigida* qualitas in se spectata, *noxium* talem *specificum* effectum *hæud* habet, siquidem *ineffabilis* hominum numerus *diu multumque intensum* satis frigus perferre solet, citra hujus affectus *consecutionem*; quare *relationes* variarum *aliarum* circumstantiarum judiciose instituendæ sunt.

## §. XIII.

Quod si porro quædam subjecta contra *adsuetudinem* & *virium* modulum ac tolerantiam, aut ipsius corporis proportionem, *cibos crassos, crudos, duros* similesque ingerant, subinde *parum bibant*, *minus* corpus moveant, *laboribusque* exerçant, corpore *tenero* instructa sint, *sedentariæ* vitæ indulgeant, indeque *crassum chylum* generent, *spissum sanguinem* colligant, necessarias ac salutare *evacuaciones* turbent, *cruditates copiosiores* in primis regio-



regionibus colligant, *viscera* abdominis magis *enervent* insuperque molem sanguinis accumulent, tunc ex hac caufarum *multitudine* atque *concurſu* perinde Scirrhus hepatis originem facile ducere ſolet: multum huc ſane *deficiens congrui* potus ingeſtio contribuit, unde *chyli* & *sanguinis* ſpiſſitudo, *viarum* ac *viscerum* proinde *comparata ſiccitas*, nec non *proportionis* *instrumentalis* ad *motus* & *functiones ſalutares* ſubeundas *laſio*, variaque alia *præternaturalium* qualitatum & *morbosarum* afflictionum ſpecimina facile oriuntur: inprimis etiam *abufiva* ingeſtio *ſpiritus ardentis* conſideranda eſt; quantum enim *incongruus* ejusmodi *ſpirituofus* potus uſus valeat, ad *functiones naturales* digeſtionis, ſe- & excretionis, depurationis lymphæ &c. turbandas & ſuſſaminandas, quotidiana edocet obſervatio, ſiquidem *crassus* & impurus inde generatur *chylus*, *viscera* primarum *viarum glanduloſo-vaſculoſa* conſtringuntur & in aliquibus ſubjectis Scirrhus hepatis excitatur: præterea *valde acida magna* quantitate ingeſta & *crebro uſu* aſſumpta ſimilem *incrassantem* & *adstringentem* effectum habent, qui ad hunc affectum excitandum etiam contribuit, quamvis hæc acida *non ſola* illius effectus cauſa exiſtant: præcipue vero *otioſum* & *valde ſedentarium* vitæ genus multum ad hujus affectus originem confert, quando præc. quædam ſubjecta diu cum *compressis thorace* & *hypocondriis* aut deſidiæ aut nonnullis negotiis, legendo, ſculpendo, nendo, ſcribendo &c. indulgent, inde facile evenit, ut in *pectore* aut *hypocondriis* ejusmodi humorum *ſtagnationes* oriantur, id quod eo facilius accidit, quo magis *aliæ* ex prædictis cauſis *una* concurrunt: interim etiam aliquando *exceſſivus, impetuoſus, ſimultaneus* ac *præceps* corporis motus



Hunc affectum excitat, quando præc. in aliquibus subjectis humores paulo spissiores existunt, ubi *vehemens* & simul *subitanea* ac *larga* affluxio sanguinis ad *hepar*, præcipitem talem *stagnationem* causari potest & solet; id quod aliàs non pauci homines experiuntur, ut sub *curfatione* aut *intensiori* alia corporis commotione modo in *liene*, modo in *hepate molestas*, aliquando plane *dolorificas* sentiant afflictiones.

§. XIV.

Præter hæc causas *variae excretionum turbæ* affectum hunc provocare solent, præc. alvi *diuturnæ* ac *pertinaces obstructions*; quæ non modo sanguinem, per *venam Portæ refluxum*, spissiores reddunt, dum illius *liberum* progressum valde impediunt, multasque *crassas* impuritates eidem insinuant, sed & sanguinem magis in *hypochondriorum* regionem comprimunt, unde *varia hepatis, ventriculi & splenis morbosa* pathemata ingruunt, quibus etiam *præsens* affectus annumerari meretur; quando *sudor repente* reprimitur, tunc in varias corporis regiones & partes *quasi regurgitat*, ac præc. & vehementibus congestionibus loca hæc invadit; adeo, ut si *ad hepar* hic devenerit insultus, illico *acutas* & *chronicas* afflictiones excitare queat, quarum *posteriorum* numero hunc Scirrhum utique adscribo: nec desunt exempla, ubi *defluxiones* & *congestionem pectoris*, successive ad *hepar decubitu* aliquo pervenere, & illic *similem* affectum provocarunt, qualem casum *Job. Raym. a Fortis l. cit.* commemorat: de *fonticulis præmature* cohibitis constant pariter ejusmodi congestiones, quæ *hepar* cum effectu *obstructionis* & *indurationis* occuparunt: maxime omnium *attento* animo advertendum est, quomodo *Mensium, Lochiorum*

&





& *Hæmorrhoidum suppressiones* & *anomalicæ* qualitates, *retrograda* aliqua congestione, ad *hepar immoderate* facta, talem affectum excitaverint: non minus *diarrhæa*, ut & *dysenteria* subito *oppressa* in aliquibus subjectis, ob *repentinam* humorum *repressionem* & subjunctam subitanearum translationem in *alia* & quidem sub præsentibus circumstantiis, *superiora hypochondriorum* loca, causam huic scirrho subministrare solet: annecto denique *quædam animi* pathemata, quæ hunc morbum allicere solent, ut *terror*, *timor*, longus & profundus *mæror*, *anxietates*, *cura*, *ærumna* quæ singula schemata affectuum animi non modo sanguinem & reliquos humores magis *ad interiora* reprimere & illico *detinere*, sed & illorum *spissitudinem* ac *irregularem* progressum adjuvare & confirmare solent, unde aliquando in *hepate theatrum*, aut *sedem* hujus affectus erigunt.

§. XV.

Hisce causis adhuc alias *peculiares* adjicio, & quidem tales, quæ ad classem *præternaturalium* respectuum pertinent; videlicet quando quædam subjecta *nimis arcte* *hypochondria* certo amictu *constringunt*, indeque legitimum ac *liberum* progressum humorum per *hepar impediunt*, ipsa hac compressione, partem eandem magis *enervant*, & ita efficiunt, quo facilius *post stricturæ* hujus *relaxationem* in hoc viscere humorum *stagnationes* oriuntur: huc etiam spectat, quando nonnulli homines in dextro hypochondrio *violentas* perculsiones, contusiones, lapsus &c. perpeffi sunt, quæ *læsiones cito* eximiam humorum *stagnationem* pedissequam habent; unde tales Scirrhi facile generantur: addo *spasmos diaphragmatis*, unde cunque hi oriantur, qui in subjectis *pletboricis* & simul aliquali sanguinis *spissitudine* præditis, *impeditum* sanguinis





nis transitum per hepar & consequentem hujus obstru-  
ctionem & indurationem causantur: huc refero arduos, vehe-  
mentes, frequentes & inconvenientes vomitus sive per  
malam medicationem provocatos, sive per vitia diætetica  
& causas alias morbificas excitatos, qui in certis subjectis,  
ubi aliæ quædam prædictarum causarum concurrunt, ta-  
lem effectum producunt, ut sub tali forti compressione  
sanguinis in hypochondriis, violento ferme modo intra  
hepar humores pellantur & incuneentur: pertinent huc  
pravæ fluxus hæmorrhoidales medicationes, sive cum vo-  
mitoriis, sive adstringentibus; sive repellentibus, quorum  
etiam famigeratum martialium, sic dictorum aperitivo-  
rum usum copiosum, aut minus judiciosum refero: vel  
quando febres intermittentes præmature supprimuntur,  
imperito Cort. Chinæ usu tractantur, aut per incongrua e-  
metica & cathartica impelluntur & præcipitantur: (huc  
spectant allegata verba ex C. Hofmanno, Boneti l.c.n. V. eodem  
nomine signabo, si post febres diuturnas & forte malignas,  
in quibus medici non recte curarunt hepar, accidat Scirrhus)  
vel quando malum hypochondriacum sinistre tractatur, vi-  
del. similibus vomitoriis, purgantibus, adstringentibus,  
martialibus, calefacientibus &c. vel quando hoc malum  
pravis moribus, affectibus animi & perversa diætâ confir-  
matur & exacerbatur; nec desunt testimonia, quibus  
probari potest, quod male tractatæ & exacerbatæ tusses  
pectorales, aut excitatæ ac incitatæ tusses hypochondriacæ,  
nec non retrôpulsa podagra & œdemata pedum, hunc Scir-  
rhum hepatis provocaverint: cui classi causarum plures  
adjungere possem, ni præsens animadversio facile ansam  
præbere queat, quomodo reliquæ connexæ observationes  
conciliari & dijudicari debeant: quam ob rem jam anti-  
quiores



quiores medici annotarunt & indicarunt, quomodo *inflammationes hepatis* male tractatæ, ut supra monui & simul *Riverii* testimonium annecto, eundem affectum post se trahere soleant, id quod ego etiam ad *perversam* directionem medicam extendo ac refero, quæ *congestionibus* passim in *abdomine* occurrentibus combinari non raro solet, ita ut secundum probatorum medicorum attentam observationem Scirrhus hepatis frequentius ex culpa *male* suo officio fungentium medicorum, quam aliarum ex parte hætenus recensitarum causarum proveniat: denique significo, quod interdum *prediga* sanguinis evacuatio, aut *anoterica*, aut *catoterica* nec non *abortus male* tractati, sicut *universo* corpori, ita etiam hepati gravem *imbecillitatem* obtulerint, huncque affectum sub certarum circumstantiarum *conspiratione* invitaverint.



§. XVI.

At brevitati operam dans, plura quoad causarum commemorationem & *specialissimam* symptomatum explicationem addere tempus hæud permittit: illud adhuc indico, quod ob *morbosam* immutationem & offensionem *nobilis* hujus visceris, *functiones* in eodem administrari solitæ, nunc aut *cægre*, aut *insufficienter*, aut *plane non* continent: & quemadmodum hepar *suis functionibus* multis modis *ordinariis salutaribus* evacuationibus *præparante* effectu admodum inservit, eapropter in hoc affectu & *alvi* & *urinæ* & *sudoris* defectus observatur, ni *consummato* tandem hoc affectu *tales* evacuationes ob *extremum motuum* & *virium* languorem, utpote *prodromus* & index *funesti* exitus, nonnunquam elabantur: & dum hepar *suis functionibus*, omnibus *reliquis* vitalibus & naturalibus operationibus *adjutricia* præbet officia, ita sub hoc affectu evenit, ut

E

pede





œconomia vitalis corruat, vires succumbant, corpus contabescat, hectica febris irruat & denique fatalis eventus consequatur: nec illud phænomenon levi oculo advertendum est, quod cum plurimis hepatis vitiis pro subjectorum ratione & corporis dispositione, aut tempestive edematosus, aut circa funestum decursum hydrops ascites concurrat: siquidem non modo sub hoc affectu massa sanguinis & præc. Lympha spissiore consistentiam acquirit, ut e pedibus perpendiculari motu difficilius adscendat, adeoque facilius regurgitet & illico stagnationem patiatur ac intumescentiam causetur, sed & dum ob hepatis infarctum refluxus sanguinis ex infernis regionibus impedior redditur, indeque partes inferiores magis enerventur, evenit ut hæc imbecillitas successive in pedes se extendat, qui eapropter suo robore aut tono tam vegete humores in refluxu suo motu adjuvare haud possunt, unde illæ regurgitationes, stagnationes & intumescentiæ: quoniam vero circa hepatis vicinitatem numerosissima lymphatica vascula dispersa sunt, unde ab hepatis majori labe & læsione, indeque proveniente lymphæ alteratione & spissiori consistentia acquisita, membranosæ partes & vascula lymphatica relaxantur, dilacerantur, adeoque hydropis ascites proximæ consecutioni via aperitur: quæ meditationes succincta explicatione, quoad Pathologicam hujus affectus disquisitionem, hujusque fundamenta satisfacere poterunt.



#### §. XVII.

Superest ut Practicam adhuc hujus affectus directionem addam, in qua primo loco cautelas aliquas utiles ac necessarias præmittam: nocent itaque in hoc affectu artificialēs sanguinis evacuationes, confuse ac perversæ institutæ, & quidem vel quantitate nimia, unde præsens hepatis indu-



induratio magis obfirmatur, vel *insufficientes*, quæ vicissim rectius secundum *morbi* statum, *subjecti* rationes, & affectus *causas* ordinandæ sunt : proinde subtractio sanguinis e *superioribus* corporis regionibus magis adversæ in hoc affectu sunt, quoniam *inferioris* corporis loca *majorem sublevationem* postulant, ne *largior affluxio* ab hac regione proveniens, *affectam* partem & *connexas vicinas* magis oneret; porro non consultum est *indiscreto* tempore talem sanguinis evacuationem ordinare, quoniam aliquando *aliæ* operationes therapeuticae *præmitti, interponi & subordinari* debent: omnes *immodicæ, impetuosæ, excessivæ & tumultuariæ aliæ* evacuationes valde *nocent*, adeoque interdum in hoc casu *mortem accelerant*; quare a vomitoriis & fortioribus purgantibus, deinde ab immoderatis diaphoresibus eximie *abstinendum* est: nocent omnia remedia *sanguinem valde commoventia, exæstuantia, calefacientia, expandentia*, quæ semper *præsentem* hepatis infarctum *exacerbant*: absint omnia *incrassantia, refrigerantia, adstringentia*, quæ magis *præsentem* morbum *confirmant*: cavendum etiam est a negligenti *ordinariorum, præc. alvinarum, evacuationum* promotione, abstinendum etiam est a *communi narcoticorum* usu, quæ citius, æque ac adstringentia hecticos, cachecticos, œdematosos & hydropicos affectus provocant; nocent *aloëtica* remedia, vel *incorrecta, vel larga copia ingesta*, quæ communiter motum sanguinis in abdomine *valde augent* & ad strenuos *orgasmos & congestorios* conatus disponunt: officiunt quæcunque *prægressarum salutarium hæmorrhagiarum* ultiores *perturbationes, per mala medicamina & regimina* sustentatæ: impr. etiam nocivæ sunt *variabiles* medendi *methodi ac multorum & discrepantium* remediorum





ingestiones; nec non *coactæ ac præcipitæ* hujus affectus curationes, quæ communiter præcipitem *funestum* eventum causantur: admodum etiam ominosus est *communis martialium* usus, quibus secundum *vulgarem* opinionem singularis vis aperitiva tribuitur: omnium maxime præjudiciosa est *negligens ac retardata* hujus affectus cura, quoniam sub tali mora præsens affectus continuo *firmiores & majores* facit progressus: denique *empirica* illa sic dictorum *aperitivorum & hepaticorum* ordinatio, citra *conciliationem causæ morbi*, valde *inimica & ominosa* existit.

## §. XVIII.

Seorsim vero in *positiva* medendi methodo præstat *generica* obstacula remove & quidem ubi *sanguinis plenior* copia urget, ut & ubi *conjuncta est sanguinis spissitudo*, nec non quando *omissæ & suppressæ salubres hæmorrhagiæ*, aut *anomali* Hæmorrhagiarum successus, non minus *diætæ plena & spirituosa* una cum fortioribus *animi pathematibus* hunc affectum provocarunt, tunc tempestivæ *moderata & iterata* V. Snes in *pedibus* conducunt, quæ in talibus moderaminibus ac sub talibus circumstantiis usurpatæ, haud *hydropem*, quem aliqui inde provenientem metuunt, invitant: Cucurbitularum cum *scarificatione* usus in hoc affectu *parum utilitatis* promittit: proinde multum refert, quo *alvus constanti libertate* fruatur, quæ excretio lenientibus & laxantibus mediis adjuvanda & promovenda: hæc alvi promotio ita dirigenda est, ut nunc *diæreticis*, aliquando etiam *pharmaceuticis* perficiatur: quare e classe *priori* ordinanda sunt juscula lenientia, gelatinosa, cum herbis temperantibus & emollientibus combinanda, utpote *chærefolio, spinachia, beta*  
alba



alba; eo pertinent passulata, prunata, poma & pyra dulcia modico  
 saccharata & cocta, juscula dilutiora farinacia, lacticinia, præci-  
 præjudiciosa *bilis copia* in intestinis deest: ordinentur pariter sub-  
 diata *congrua pinguis*, comestio butyri non fricti, *oleorum* diate-  
 ticorum *accepta* formula ordinandorum: e. penu *Pharmacie*  
 profunt *tamarindinata*, *manna tartarifata*, usus *rhabarbari* cum  
*passulis utrisque* (sicut *Raymund a Fortis* sub consensu mulcorum  
 medicorum *Tom. 2. Cent. 4. consult. 39. p. 526.* Rhabarbarum ad he-  
 patis obstructions reserandas *prestantissimum* remedium esse æsti-  
 mat, id quod etiam *Tilingius* in *sua Rhabarbarologia* fusius testatur  
*conf. Fernellius method. Lib. 5. c. 9. Zornius in Botanolog. med. sub tit.*  
*Rhabarb.* ubi multa authorum suffragio suo adfidentium series  
 prostat) ad hæc referri possunt passulæ laxativæ, pruna laxativa,  
 pilulæ de ammoniaco, laxantia tartarifata, utpote arcanum tar-  
 tati, terra foliata tartari, sal anglicanum, sal sedlicense &c. quæ  
 singula in liquida formula meliorem opem præstant: ordinentur  
 interdum infusa vinosa ex radic. ari. helen. vincetox. petasit. rub.  
 timet. gent. rubr. herb. absinth. cochlear. cent. minor. tanacet. arnic.  
 millefol. e. flor. &c. additis tamarindis, passulis utrisque, sem. synap.  
 & arcan. tartar. quale infusum cum aqua Syvalbacens. aut Selte-  
 rana dilui, bis per septimanam adhiberi & conjuncto *moderato*  
*motu equitationis* aut *vecturæ* sublevari debet: hisce per interval-  
 la aliquando subordinentur *clysteres lenientes* & *mediocriter ro-*  
*borantes*, ut videlicet intestinorum tractus, præter reliquum *alvi-*  
*næ* excretionis successum in congrua *lubricitate* & *flexilitate* con-  
 fervetur, insuper etiam *molesti flatus* educantur: aliquando peritus  
 artifex variare potest cum decocto ex radic. apii bardan. cichor.  
 taraxac. vincetox. gramin. asparag. herb. cent. min. cochlear. tri-  
 fol. fibr. tanacet. arnic. millefol. veronic. hed. terr. sem. cary. pe-  
 trofel. foenic. bacc. junip. laur. tamarind. rad. polyp. quern. bryon.  
 & sale Sedlicensi aut crystall. tart. parato: quod bis per hebdoma-  
 dam cum moderato corporis motu subordinato adhiberi & per  
 aliquot septimanas continuari potest.

§. XXI. Deinde conveniunt auxilia interna *emollientia* & sanguinis  
*massam resolventia*, subinde etiam *progressum* illius per *hepar* & *n-*



*niversum* reliquum corpus *facilitantia*: pertinent huc juscula cum herbis recentibus diæteticiis lenientibus decocta, additis temperatis roborantibus: eo spectant decocta ex modo nominatis vegetabilibus sine laxante additamento parata; subordinentur pilulæ ex extr. vincetox. cent. min. trifol. fibr. cochlear. squill. G. ammoniac. bdell. sagapen. juniper. thereb. coct. paratæ: propinetur decoctum herb. & flor. arnic cum flor. sambuc. & chamom. vulgar.: alternative propinetur liquor. terr. fol. tart. tinct. antim. tartar. & spirit. nitr. dule. conferunt etiam salia digestiva, tenerrime pulverisata, aut in forma potionis ordinanda; hinc *Hartmannus* in sua *praxi chymicæ*. ubi c. 174. de *Scirrbo* agit, eximie tartarum vitriolatum laudat: propinetur itaque aliquando potio ex aqua scordii. fl. sambuc. a. eac. scorzon. cinnam. ceras. nigr. cum extr. squill. bacc. junip. vincetox. cent. min. ut & G. ammoniac. & tartar. vitriol. amar. nonnunquam decoctis *modica* quantitate addantur herb. scolopendr. marrub. alb. trifol. fibr. millefol. bellid. alioquin iisdem combinari potest Lign. Junipr. Lentiscinum & Santalinum citrinum: remedia *concentratiora* & spirituosâ *haud secure* huic quadrant affectui; decoctum *viperarum* in initiante quidem tali *Scirrbo* opem affert, in auctiori vero aut plane consummato nihil ad vota operatur: ita etiam mercurius dulcis parum utilitatis confert: quemadmodum aqua mercurii vivi magis *empiricum* usum invenit, salia vegetabilia ut centaur. min. absinth. acetos. card. ben. imperat. ononid. card. fullon. in potionibus additis extractis resolventibus & roborantibus adhibita aliqualem proficuum usum pollicentur & exequuntur, nonnunquam exhibeatur spirit. sal. ammoniac. ess. succin. juniper. vincetox cum tinctur. tartar. aut liquore terræ fol. tartari: præter hæc conducit etiam opportunus usus, *preparato* videl. prius corpore, *acidularum* Pyrmontensis, Svalbacensis, Selteranæ, Sedlicensis aut similis *resolventis* & *excretiones* promoventis alterius, sub connubio *motus* moderati: multum enim omnium hætenus commendatorum auxiliorum usum sublevat & *salutarem* effectum promovet & faciliat *moderatus* corporis *motus* una cum *congruis peregrinationibus*: adhibeantur præterea per intervalla & cum aliquâ variatione *vina medicata* cum aqua subterranea Wildungensi, Svalbacensi aut alia, *temperanda*, conficienda ex rad. vince-

tox.



tox. enul. bardan. caryophyllat. gentian. rubr. cyper. rot. herb. capill. vener. absinth. cent. min. trifol. fibr. cochlear. mentha. citr. flor. sambuc. lavend. sumit. organ. millefol. sem. foenic. bacc. junip. L. santal. citr. rad. polypod. quern. passul. utrisque & creta tartari: *Lactis* usum internum in hoc affectu non facile adhibere scue probo, euratorio præc. scopo; admitrendum, ne huic visceri affecto, utpote *primarum viarum principali*, uberiore *cruditates* ac crassæ substantiæ adducantur.

§. XX.

Cum hisce internis remediis conjungenda sunt auxilia *alia*, quæ *symptomata* huic affectui *familiaria* aliaque *adventitia* mitigent & avertunt; imprimis *suspectæ ebullitiones* & *congestionés* sanguinis *leniantur* remediis temperantibus, velut decocto C. C. passulato, aut pulvere ex Lap. 69 citrat. corall. rubr. ppt. & nitr. depurato conficiendo: huc contribuit Elixirium ex aqua chærefol. scorzoner. lil. alb. fl. sambuc. acaciar. syrup. rosar. solutiv. conserv. flor. malv. & spirit. nitr. dul. una cum C. C. sin. ign. & corall. rubr. ppt. conficiendum. Antihecticum Poterii in hoc morbo haud commendando, quod potius præsentem hepatis *obstructionem auget* & confirmat: *alvi adstrictio* & *molesta flatulentia* prædictis remediis corrigatur: *angustiæ præcordiales* mitigentur *moderata* promotione *necessariorum* excretionum, ominosorum *spasmodum* præoccupatione aut remotione, *flatulentia* ventriculi & intestinorum ablatione, nec non *progressus* humorum per *hypochondria* promotione: *urgenti acerbiori tussi* ordinanda sunt remedia lenientia, diluentia, temperata, resolventia ac excretionem alvi promoventia: è *sedantium* numero conducunt cinnabarina, papaveracea, extractum chamomillæ, refractus usus castorei, extr. chaccarillæ aquosum, quæ cum *variis formulis* combinari possunt. *Externe* conducunt *Balnea* ex emollientibus & resolventibus instruenda, velut ex speciebus emollientibus, ut & rad. caryophyllat. vincet. ireor. flor. levistic. cyper. rotund. valerian. herb. matricar. hyssop. organ. abrotan. ferpill. flor. spic. lavend. verbasc. aneth. sambuc. bacc. laur. & junip. sem. dauc. foenic. nigell. &c. conficiantur etiam ex ejusmodi speciebus *Cataplasmata* cum lacte, addito croco orientali & tantillo camphoræ: deinde conducit Emplastrum de Cicuta, quod inter



inter medicos communem tenet applausum, nec non Empl. Saponatum Barbette cum Camphora mixtum: subordinetur interdum usus *Pediluviorum*, si præc. sanguinis *congestiones* hunc affectum frequentius comitentur: unguenta & linimenta vero pingua ad hunc affectum laud secure quadrant: neque etiam ita dictis specificis, (velut succo anagallidis, rad. & cort. cappar. &c.) quæ circumferuntur, fides facile tribuenda, quæ quidem ubique commemorantur, aut desideratus effectus nondum sufficienter probatus constat: topicis remediis addo Ceratum de ammoniaco mixtum cum empl. de bacc. laur. oleo tart. foetid. & camphor. *Plurimum* in hoc affectu *Motus* corporis congruus & *potus* conveniens proficiunt: Quod denique *Dietam* attinet, tunc illius institutio & ordinatio facile ex *precedentibus*, maxime ex causarum commemoratione colligi poterit, ubi inter alia annecto, quod in excretionum directorio ratio etiam habenda veniat in aptis subjectis revocationis & congruæ promotionis *Mensium* & *Hæmorrhoidum*, quemadmodum *Casp. Hofmannus institut. Lib. 3. c. 65.* commemorat, quod hic affectus aliquando e *talium Hæmorrhagarum retentione* originem trahere queat: ob id prudens medicus *illarum* circumspectam ac peritam *revocationem* curæ cordique habeat: in omni vero reliqua medicatione medicus animum applicet ad illas præcipuas *causas*, quæ *principaliori* efficacia hunc morbum provocarunt, quibus dextre, perite & opportune removendis, aut infringendis sedulam & sollicitam operam ipse impendat; quoad expectationem vero *solutaris* effectus, sciendum est, quod *principiis* hujus morbi dextre subvenire conveniat; hinc *Capivaccius* l. c. dicit *Scirrhus jecoris ab initio est periculosus & difficulter curatur: antiquus curari nullo modo potest*: Hæc sunt, quæ quoad *fundamentalem* ardui hujus affectus explicationem proferre placuit: reliquam *specialissimam* deductionem *ulteriori* meditationi aliis relinquo: utinam meliora de hoc intricato affectu promittere potuerim, aut cum ratio, observatio & medicorum confirmatio non meliora speranda permittant, intererit, maxime, ut periti medici, quantum fieri potest, hujus affectus *accessum* sollicite & dextre *averant*: aut vela mea contrahere teneor. DEO humillimas offerens gratias, quod in præsentî conatu animo suo auxilio ac moderamine mihi adesse voluerit, quæpiis precibus flagito, ut omnibus reliquis meis propositis salutem & exquisitum largiatur successum atque